

周

禮

正

義

周禮正義卷五

瑞安孫詒讓學

小宰之職掌建邦之官刑以治王宮之政令凡宮之糾禁杜子春云宮皆當爲官立謂宮刑在王宮中者之刑建明布告之糾猶割也察也若今御史中丞疏掌建邦之官刑以治王宮之政令者天官通掌官府而小宰宰夫官正官伯特治宮政此王宮刑政等皆小宰所專領不佐大宰者也凡施行爲政布告爲令月令注云宮令幾出入及開閉之屬是也云凡官之糾禁者卽士師五禁一日宮禁此官與彼爲官聯也注杜子春云宮皆當爲官者子春河南緇氏人劉歆弟子鄭大夫鄭司農皆從受學詳賈序周禮屢典引馬融傳馬鄭序皆不云杜有詒釋之書

射人先鄭注引子春說而糾之則注中所述杜義疑皆先鄭所
日受著之解詁者後鄭又傳錄之也杜意此節三宮字及職末
乃退以官刑憲禁于王宮諸官字並當爲官以大宰八灋大司
寇五刑並有官刑無官刑宮官字形又相近故破官爲官段玉
裁云凡易字之例於其音之同部或相近而易之曰讀爲其音
無關涉而改易字之誤則曰當爲或音可相關義絕無關者定
爲聲之誤則亦曰當爲云玄謂官刑在王宮中者之刑名鄭不
從杜易字也釋文謂干氏亦同王宮中謂皋門以內及後宮大
司寇五刑不數官刑而士師五禁以官禁爲首此官刑蓋卽犯
官禁者之刑也賈疏云後鄭以官刑宮中之刑不從子春官刑
者見秋官司寇已云四日官刑此小宰不書其之刑不復重言

又見下文觀治象乃退以宮刑憲禁于王宮故知宮刑明矣況元云經首云掌建邦之宮刑以治王宮之政令末云以宮刑憲禁于王宮宮正宮伯等職皆言王宮經無有言王宮者則宮刑之非宮刑審矣云建明布告之者敘官注云建立也凡物建立之則眾共見故引申之凡明白布告亦曰建云糾猶割也察也者宮正寺人大司徒注並同說文糸部云糾繩三合也引申之凡有所繩治並謂之糾大司馬注云糾猶正也廣雅釋詁云割斷也凡物有偏邪者必斷割之乃正故糾訓正亦得訓割也訓察者漢書平帝紀顏注云糾謂禁察也左傳僖二十八年孔疏云糾者繩治之名割察皆繩治之事故鄭兼兩義爲釋賈疏云既言糾謂糾舉其非事已發者依法斷割之事未發者審察之

云若今御史中丞者賈疏引應劭云秩千石朝會獨坐副貳御
史大夫內掌蘭臺圖籍外督刺史刺察百寮續漢書百官志劉
注引此職于注亦云若御史中丞與鄭同王聘珍云續漢書百
官志御史中丞一人千石本注曰御史大夫之丞也舊別監御
史在殿中密舉非法及御史大夫轉爲司空因別留中爲御史
臺率鄭舉以汎小宰者謂其殿中密舉非法與小宰掌官之糾
禁相似非必校其官職之大小也黃以周云鄭注舉漢官以汎
周官有二例其直況之於序官者如大府之爲司農司會之爲
尚書是疑之以其官也其注序官不以汎而況之於職內所掌
之下者如大司徒掌建邦土地之圖曰若今司空郡國輿地圖
里幸以歲時合耦于耕日若今街彈之室皆疑之以其事也此

舉漢御史中丞以況小宰亦謂其糾禁宮事同爾西漢御史中丞內領侍御史外督郎御史主糾察百僚東漢御史中丞屬少

府乃糾察宮事故鄭舉以況之非儻其官也掌邦之六典八灋八則之貳以逆邦國都鄙官府之治逆迎受之鄭司農云貳副也疏掌邦之六典八灋八則之貳以逆邦國都鄙官府之治者

此掌大宰治法之副貳與司會司書大史內史爲官聯也以下

皆佐大宰之事賈疏云大宰本以六典治邦國今還以六典逆

邦國之治逆謂迎受鈞考之也大宰本以八法治朝廷官府今

還以八法鈞考官府之治大宰本以八則治都鄙今還以八則

鈞考都鄙之治皆鈞考使知功過所在也注云逆迎受之者

小祝注云逆迎也聘禮注云逆猶受也宰夫萬民之逆先鄭注

云逆迎受王命者是經言逆者皆爲迎受之義鄭司農云貳副也者大史司勳大司寇大行人注義並同說文貝部云貳副益也大史司勳注並云貳猶副也則是以副爲引申之義與許義微異此注不言猶者文不具六典八法八則大宰修立其書彼

爲正本小宰執其副本也執邦之九貢九賦九式之貳以均財

節邦用

疏執邦之九貢九賦九式之貳者此亦治法之副貳大

宰修其正本小宰執其副本與司會司書爲官聯也賈疏云此三者並大宰所掌者以其冢宰制國用九貢九賦斂財助九式用之事之大者故小宰副貳之然大宰有九職小宰不貳之者以其九職云任萬民小宰若云貳謂任使亦貳之故不言其實九職任之使之出貢用之則小宰亦貳之九貢中兼之矣以其

九職亦有九貢故也案依賈說則此九貢卽大宰司會之九貢本據邦國之貢而實兼有閭師之八貢卽大宰九職之貢也大府邦國之貢萬民之貢二者同稱貢故此經亦以一兼二與大宰詳略互見也云以均財節邦用者大宰云以九式均節財用是也以官府之六敘正羣吏一日以敘正其位二日以敘進其治三日以敘作其事四日以敘制其食五日以敘受其會六日以敘聽其情敘秩次也謂先尊後卑也治功狀也食祿之多少情爭訟之辭疏以官府之六敘正羣吏者自此六敘至後之事之法並小宰之官法也羣吏與大宰義同亦通百官府言之賈疏云凡言敘者皆是次敘先尊後卑各依秩次則羣吏得正故云正羣吏也云一日以敘正其位者謂若司士治朝之朝位小

司寇外朝之朝位皆依爵秩尊卑爲次也云二日以敘進其治者賈疏云謂卿大夫士有治職功狀文書進於上亦先尊後卑也云三日以敘作其事者謂國有大事射人作卿大夫司士作士諸子作庶子皆以尊卑之敘作之象胥云凡作事王之大事諸侯次事卿次事大夫次事上土下事庶子亦以敘作事之等差也云五日以敘受其會者通月要歲會言之下文云月終則以官府之敘受羣吏之要事也受會詳後疏云六日以敘聽其情者後注云聽平治也凡羣臣以事來詔請辨訟者亦依敘次平治其情實也注云敘秩次也謂先尊後卑也者說文支部云敘次第也秩次與次第義同經典多段東西牘之序爲之此較衡用古字作敘注例用今字作序雖述經文亦然此注仍作

敘後人不知注例依經文改之云治功狀也者喪服注云治
猶理也謂所治辨之功效事狀也云食祿之多少有醫師注云
食祿也論語衛靈公篇事君敬其事而後其食集解引孔安國
云先盡力而後食祿經典通稱祿爲食分言之則食與祿別周
制命士以上以爵制祿不命之士及庶人在官者則以事制食
此經凡言食者皆與祿別司士云以功詔祿以久奠食注云食
稍食也此云以敘制其食當專屬不命之小吏言之以其在官
前後之敘制其稍食與司士以久奠食事正同若祿與爵常相
因無俟於以敘制之也鄭誤合食與祿爲一賈疏謂制祿依爵
命授之並未得經義祿食之異詳宮正疏云情爭訟之辭者賈
疏云情謂情實財獄訟之情受鬻斷之時亦先尊後卑也惠士

奇云聽其情君之所以體臣韓詩外傳言人主之疾十有二發而隔居其一焉下情不上通謂之隔管子亦言國有四亡其二日墾日侵塞者下情不上通侵者下情上而道止以敘聽其情則通而不隔行而不塞誰得而侵之黃以周說同詒讓案凡羣吏之爭訟及以事來諮問請求亦通謂之情下文云聽其治訟卽是聽其情內史云掌敍事之灋受納訪以詔王聽治注亦引此經以敘聽其情明不止聽爭訟也鄭惠各舉一偏爲釋當兼二義乃備以官府之六屬舉邦治一曰天官其屬六十掌邦治大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長

小事則專達五日秋官其屬六十掌邦刑大事則從其長小事則專達六日冬官其屬六十掌邦事大事則從其長小事則專達大爭從其長若庖人內外饔與膳夫共王之食小事專達若官人掌舍各爲一官六官之屬三百六十象天地四時日月星辰之度數天道備焉前此者成王作周官其志有述天授位之義故周公設官分職以法之疏以官府之六屬舉邦治者卽大宰八灋之一日官屬以舉邦治也云一日天官其屬六十者此並約舉大數實則六官之屬員數多寡不同皆不止六十也云大事則從其長者長謂當官之長不必六官正也若宰夫祭祀從大宰而膳澆濯是其一耑云小事則專達者釋文引干注云達決也案字書達無決訓士昏禮注云達通達也此專達亦謂

修其職事以自通達於王于說非經義權弓云公之喪諸達官之長杖注云謂君所命雖有官職不達於君則不服斬此小事可專達於王所謂達官也注云大事從其長若庖人內外饔與膳夫共王之食者以庖人內外饔皆膳夫之屬故從膳夫共王之食蓋大事職任既重治辨又繁非一官所能獨其故備設長屬長總其成屬則從其長而達於王若司士職以小臣祭僕御僕隸僕爲大僕從者亦此義也六官之內此類甚多鄭舉一端以況義爾云小事專達若宮人掌舍各爲一官者賈疏云若宮人直掌王之六寢掌舍直掌王之行設帷帳之等二官並是小事又不立長官當官行事故云各爲一官是專達也云六官之屬三百六十者以六乘六十得此數此亦約舉大數也明堂

位云夏后氏官百殷二百周三百注云周之六卿其屬各六十
期周官三百六十官也此云三百者時冬官亡矣昏義曰天子
立六官三公九卿二十七大夫八十一元士凡百二十蓋謂夏
制也黃以周云明堂位夏官百殷二百周三百此官之以職計
者也昏義王制又舉其副貳之官云三公九卿二十七大夫八
十一大元士此官之以人計者也夏殷之官必非一職止一人爲
之可依周官序官推之兩文互異義不相妨案黃說是也明堂
位就三代官數是約舉官職大數所云周三百非不數冬官也
昏義所云則三公以下正貳相參佐之數故皆以二三三增倍雖
與周六官正貳之屬不合然非一代眾官之通數則固無疑也
至周代六官大數則冬官已亡餘五官敘官或無員數或有員

數其總數無由校計北堂書鈔設官部引五經異義云古周禮說冢宰司徒宗伯司馬司寇司空是謂六卿之屬大夫士庶人在官者凡萬二千通典職官云周內外官六萬三千六百七十五員內二千六百四十三人外諸侯國官六萬一千三十二人內職掌府史胥徒賈人工人奄罪圓蠻夷貉等五隸醫人圉人虎士祝陳及奚渠邊鹽醯鹽幕酒祿眷抗餧粢等女職一萬五千九百五十人都計內外官及內職掌人七萬九千六百二十五人今以五官之屬校之並不相應未知其說云何沈彤則以五官五分取一以附冬官六官凡五萬九千三百餘人亦約略推計不能盡合也云象天地四時日月星辰之度數天道備焉者賈疏云依周禮七曜皆云周天三百六十五度四分度之一

舉全數亦得云三百六十也言地則與天配合四時言周天亦是地之數十二月亦是周天之數日日行一度月日行十三度十九分度之七日月所行亦在周天之數星辰謂二十八宿十二次亦在周天數內皆不離三百六十五度四分度之一耳天地四時日月星辰之度數所從言之異耳故尚書洪範云五紀一日歲二日月三日日四日星辰皆別言之下以歷數摠結之亦是類也詒讓案象天地四時謂六官分繫天地春夏秋冬也日月星辰之度數乃指六屬三百六十與周天度相應所謂天道備也賈說未折云前此者成王作周官其志有述天授位之義故周公設官分職以法之者賈疏云鄭依書傳云周公攝政三年踐奄與滅淮夷同時又案成王周官成王既黜殷命滅淮

夷還歸在豐作周官則成王作周官在周公攝政三年時周公制禮在攝政六年時故云前此者謂成王前於此時作周官其志謂成王志意有述天授位之義卽彼周官云唐虞稽古建官惟百夏商倍之今予小子訓迪厥官以立太師太傅太保茲惟三公論道經邦燮理陰陽下又云立三孤及天地四時之官是其志有述天地三百六十官位之義故周公設官分職法之也此鄭義不見古文尚書故爲此解若孔據古文尚書多士已下並是周公致政後成王之書周公攝政時淮夷奄與管蔡同作亂成王卽政後又叛成王親征之故云滅淮夷還歸在豐作周官用人之法則彼周官在此周禮後與鄭義異也案賈說非也鄭以書敍滅淮夷卽伐淮夷與踐奄是攝政三年事亦見書成

王政牧孔蘆引鄭書注又書周官疏引鄭注云周官亾是鄭注本無此篇今所傳爲古文周官非鄭所見且亦無述天授位之說此則真周官之逸說見於他書者故鄭得引之地官敎官疏引鄭志趙商問曰成王周官立太師太傅太保茲惟三公是漢時周官雖亡其墜文逸故猶間有傳者述天授位之說亦其一矣以官府之六職辨邦治一曰治職以平邦國以均萬民以節財用二曰教職以安邦國以寧萬民以懷賓客三曰禮職以和邦國以諧萬民以事鬼神四曰政職以服邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物懷亦安也賓客來共其委積所以安之聚百物者司馬主九畿職方制其貢各以其所有疏以官府

之六職辨邦治者此卽大宰八灋之二曰官職以辨邦治也賈疏云六官者各有職若天官治職地官敎職其職不同邦事得有分辨故云以辨邦治也云一曰治職以平邦國以均萬民以節財用者以下與大宰六典文有異同義並互相備大宰以九式均節財用故云以節財用也云六曰事職以富邦國以養萬民以生百物者書周官孔疏引馬融注云事職掌百工器用耒耜弓車之屬者賈疏云上事典以生萬民生則養也與上同此六職不云官府百官與六典不同者以六職皆當職行事義不及遠故與六典文異也注云懷亦安也者明與安邦國義同文異詩邶風終風箋云懷安也中庸懷諸侯亦此義云賓客來共其委橫所以安之者賈疏云大司徒下有遺人掌十里有膳

廩有飲食之等故云共委積也案委積詳遺人疏云聚百物者司馬主九畿職方制其貢各以其所有者並據夏官本職文職方氏所制之貢卽出於九畿內侯甸男采衛畿六畿故政職日以聚百物以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯鄭司農云大祭祀大宰贊玉幣司徒奉牛牲宗伯觀灑濯灑玉鬯省牲饅奉玉齋司馬羞魚牲奉馬牲司寇奉明水火大喪大宰贊贈玉含玉司徒帥六卿之眾庶屬其六引宗伯爲上相司馬平士大夫司寇前王此所謂官縣杜子春弛讀爲施玄謂荒政弛力役及國中貴者賢者服公事者老者疾者告舍不以力役之事奉牲者其司空奉豕

與疏以官府之六聯合邦治者此卽大宰入漢之三日官聯以會邦治也合會義同賈疏云謂官府之中有六事皆聯事通聯然後國治得會合故云合邦治也詔讓案凡官縣有同官之聯事若司市司門司閭爲縣事同屬地官是也有異官之縣事若祭祀喪紀六官之長爲縣事是也異官之屬亦多相與爲縣事若量人云月宰祭與鬱人受罪歷而皆飲之是夏官之屬與春官之屬爲縣事也云五日出役之縣事者田役謂起徒役以出獄卽大司馬春蒐夏苗秋獮冬狩是也亦兼陔諸功作之事詳大宰疏云六日斂弛之縣事者釋文云弛劉本作施音弛杜作施案陸謂杜作施戴鏡堂嚴可均並謂疾讀作言之是也蓋杜鄭義本異劉本則涉杜讀而誤陸所不從賈疏云並大宰任九

職九貢九賦司徒制貢小司徒令貢賦若通數小官則多矣吳廷華云斂是征賦施是施惠其聯事斂則載師閭師之屬施則遺人旅師之屬皆聯事也云凡小事皆有聯者以上祭視大者並據大事而言其中亦有小事若小祝云凡外內小祭視小事紀小會同小軍旅掌事焉是也至六者之外取小事則條目尤繁多故經並不悉舉也賈疏云謂司門云掌國貨之節以聯門市之類是也注鄭司農云大祭祀大宰贊玉幣司徒奉牛牲宗伯親疏禮位玉帛牲犧奉玉羞司馬羞魚牲奉馬牲司寇奉明水火者此各據本職所謂祭視之聯事也五官長屬官聯無移不可具述故略舉五官之正以明義也云大喪大宰贊贈玉含玉司徒帥六鄉之眾庶屬其六引宗伯爲上相司馬平士

大夫司寇諸王者亦各據本職所謂喪之聯事也六引引釋文作矧云徐音涓劉音引本或作引案大司徒職亦作引賈疏云司農雖解祭祀及大喪二事皆不言司空司空亡故也大祭祀唯大宰尊不奉牲宗伯不言奉雞司馬直言奉馬不兼言奉羊司寇不言奉犬皆略不言可知呂飛鷗云喪與荒爲二事鄭司農注喪之聯事已具不言荒者略也掌救荒之事者非一官故有聯事如小宰受幣玉大司徒以十二荒政聚萬民大宗伯以荒禮哀凶札小宗伯職云大戮及執事禱祠于上下神祇士師職云若邦凶荒則以荒辨之灑治之是也云此所謂官聯者聯黃丕烈校改連是也此據大宰文先鄭彼注讀聯爲連則此注聯亦當作連矣云杜子春弛韻爲施者丁晏云遂人與其施舍

者注施讀爲弛遂大夫與其可施舍注施讀亦爲弛土均與其
施舍注施讀爲弛毛詩矢其文德傳矢施也孔子閒居引詩弛
其文德注弛施也古字多通用云玄謂荒政弛力役者賈疏云
此經二日喪荒荒謂年穀不熟大司徒有荒政十二其中四日
弛力弛力役謂廩人歲不能人二釜則令移民就穀是時弛力
役也段玉裁云此鄭君不從杜易字也吳廷華云弛當依杜氏
作施施與斂出入相對乃稱也王引之云弛舍與賦斂意義不
倫無由並舉當以讀施爲是斂者聚也施者散也或先施而後
斂或先斂而後施地官旅師掌聚野之糊粟屋粟閒粟而用之
以質劑致民平頒其獎積施其惠散其利而均其政令凡用粟
春頒而秋斂之鄭注曰困時施之饑時收之此先施而後斂也

司稼掌巡邦野之稼以年之上下出斂灋掌均萬民之食而調其急倉人掌粟入之藏有餘則藏之以待凶而頒之此先斂而後施也又鄉師以歲時巡國及野而廩萬民之雞阤以王命施惠司教凡歲時有天患民病則以節巡國中及郊野而以王命施釐惠遺人掌邦之委積以待施惠鄉里之委積以恤民之雞阤門闈之委積以養老孤則掌施惠之事者非一官故曰斂施之職事也案吳王二說是也云及國中貴者賢者服公事者老者疾者皆舍不以力役之事者賈疏云卿大夫云國中貴者謂有官爵者賢者謂有德行者服公事者謂若庶人在官者老謂國中六十者疾者謂廢疾不堪役者皆舍不以力役之事也云奉牲者其司空奉豕與者以先節祝祭宗祀之膳事五官皆備惟司

空獨闊故補其義小宗伯先鄭注說毛六牲亦云司空主豕月令注云彘水畜也賈疏云司空雖亡案五行傳云聽之不聰時則有豕禍豕屬北方又說卦云坎爲豕是豕屬水故知司空奉豕無正文故云與以疑之也以官府之八成經邦治一曰聽政役以比居二曰聽師田以簡稽三曰聽閭里以版圖四曰聽稱責以傅別五曰聽祿位以禮命六曰聽取予以書契七曰聽賣買以質劑八曰聽出入以要會鄭司農云政謂軍政也役謂發兵起徒役也比居謂伍籍也比地爲伍因內政寄軍令以伍籍發軍起役者平而無遺脫也簡稽士卒兵器簿書簡猶閼也稽猶計也合也合計其士之卒伍閱其兵器爲之要簿也故遂人職曰稽其人民簡其兵器國語曰黃池之會吳陳其兵皆官師

據錄拱稽版戶籍圖地圖也聽人訟地者以版圖決之司書職
曰邦中之版土地之圖稱責謂貸子傳別謂券書也聽訟賣者
以券書決之傳傳著約束於文書別別爲兩兩家各得一也禮
命謂九賜也書契符書也質劑謂市中平賈今時月平是也要
會謂計最之簿書月計日要歲計日會故宰夫臘日歲終則令
羣吏正歲曆月終則令正月要傳別故書作傳辨鄭大夫讀爲
待別杜子春讀爲傳別立謂政謂賦也凡其字或作政或作正
或作征以多言之宜從征如孟子交征利云傳別謂爲大手書
於一札中字別之書契謂出予受入之凡要凡簿書之最目獄
訟之要辭皆日契春秋傳曰王叔氏不能舉其契質劑謂兩書
一札同而別之長曰質短曰剂傳別質劑皆今之券書也事異

異其名耳禮命禮之九命之差等疏

以

官府之八成經邦治者

此卽大宰入藻之五日官成以經邦治也彼注云官成謂官府

之成事品式也案八成與後文歲會月要日成之成義同謂成

事品式著於簿書文券可以參驗者其目有八也詳大宰疏云

一日聽征役以比居者賈疏云人事皆聽者舊事爭訟當斷之

也政謂賦稅役謂使役民有爭賦稅使役則以地比居者共聽

之吳廷華云聽察也政役八者皆邦治比居八者則成典之在

簡冊者也入成繫於邦治之大聽訟特獄吏事賈謂入者皆聽

斷之事誤案吳說是也此入成皆官府經常之法凡治民者皆

取正於是聽與後文聽治訟義同彼注云聽平治也蓋几否決

校攷辨論陳乞皆平治之所該矣大司寇云凡諸侯之獄訟以

邦典定之凡卿大夫之獄訟以邦灋斷之凡庶民之獄訟以邦
成弊之邦成卽此入成彼經與六典八法同舉是獄訟雖以典
法成三者爲聽斷而典法成非專爲聽獄訟而設先鄭唯以聽
訟說版圖傳別而賈疏遂謂入者專爲聽爭訟之事皆偏舉一
端義殊未該也云二一日聽師田以簡稽者大宗伯軍禮云大師
之禮用眾也大田之禮簡眾也師田發眾庶故以簡稽之簿書
錄之云三日聽閭里以版圖者賈疏云在六鄉則二十五家爲
閭在六遂則二十五家爲里閭里之中有爭訟則以戶籍之版
土地之圖聽決之詔讓案聽閭里者謂畿內界域錯互戶口移
徙之事則案版圖以治之云閭里者偏舉鄉遂及郊里言之若
在公邑都鄙則爲井邑丘甸猶司書職通畿內而云掌邦中之

版亦舉邦中以晐審遂都鄙皆文不具也版圖卽大司徒司士職方氏司民及有地治諸官所掌是也云四曰聽稱責以傳別者賈疏云稱責謂舉責生子於官於民俱是稱也爭此責者則以傳別券書決之云五曰聽祿位以禮命者禮命謂國之禮籍王之策命若典命內史所掌是也賈疏云謂聽時以禮命其人策書之本有人爭祿之多少位之前後則以禮命文書聽之也江永云爭祿位如周廿人與晉閭嘉爭閭田王叔陳生與伯輿爭政之類云六曰聽取予以書契者說文子部云予推予也賈疏云此謂於官直貸不出予者故云取予若爭此取予者則以書契券書聽之案取予亦通官民財用頒授之事言之賈謂於官直貸不出予非是云七曰聽賣買以質祿者卽質人所掌者

是也賣買亦通官民言之云八日聽出入以要會者凡斂散經用之會計若司會司書所掌是也賈疏云歲計日會月計日要此出入者正是官內自用物有人爭此官物者則以要會簿書聽之注鄭司農云政謂軍政也者先鄭讀政如字謂軍賦之政事管子小匡篇云卒伍政定於里軍旅政定於郊所謂軍政也然軍政與發兵事同故後鄭不從云役謂發兵起徒役也者說文殳部云役戍邊也國語吳語韋注云役兵也是役本爲兵戍因之凡因事興起徒役者並謂之役發兵不入師出者此爲平時部署征調尙未成軍之事與彼小異也云比居謂伍籍也者小司徒先鄭注云五家爲比故以比爲名大史注云居猶處也賈疏云卽司徒職五家爲比出軍卽五人爲伍惠棟云附續

予有東伍令史記鴻唐傳有尺籍伍符詔讓案先鄭意蓋謂比居卽伍籍與下注版戶籍小異伍籍謂每户人民可任力役者之姓名校比之時亦依軍法聯其什伍戶籍則無論男女老小凡施舍不任力役者亦咸登於版詳略殊也後鄭亦從其說吳廷華云此卽小司徒之比要蓋人民多寡之籍也旣考其籍又驗民居之數以實之則役不溢矣案吳說較先鄭爲長易祓孔廣森亦並謂小司徒云凡民訟以地比正之地訟以圖正之彼圖卽下版圖之圖地比卽此比居之比其說亦是蓋每年校比三年大比皆有總要其征役弛舍咸具於書故其治訟卽依此聽之若然比之名義卽起於校比猶簡車徒之簿要卽謂之簡先鄭謂取五家比伍爲名非其義也云比地爲伍因內政奇軍

令者賈疏云謂在家五家爲比五比爲閭四閭爲族五族爲黨五黨爲州五州爲鄉若出軍則家出一人則還五人爲伍是一比長還爲五長領之二十五人爲兩是一閭閭胥卽爲兩司馬領之以此言之至一鄉出一軍軍將還是鄉大夫爲之是因內政寄軍令此管子文彼云作內政司農云因內政者讀字不同案賈說非也先鄭蓋據國語齊語管子曰作內政而寄軍令焉彼下文卽說軌里卒伍之事韋注云內政國政也因治政以寄軍令也管子小匡篇寄作寓非先鄭所據因內政與韋注義合蓋以意改亦非讀字不同也云以伍籍發軍起役者平而無遺脫也者謂案伍籍以攷夫家可任之人數而發軍起役則政役均平無過勞亦無遺脫避役之弊也云簡稽士卒兵器簿書者

凡士卒姓名部分兵器種物凡數皆著於簿書謂之簡稽郊特
莊云簡其車賦而厯其卒伍注云簡歷謂算具陳列之也管子
問篇云時簡稽帥牛馬之肥瘠出人生死之會幾何又侈靡篇
云斷指滿稽斷首滿稽斷足滿稽而死民不服則弊刑之簿書
亦得謂之稽不徒師田矣簿書詳敘官疏云簡猶閱也者遂大
夫注同廣雅釋詁云簡閱也左桓六年傳云大閱簡車馬也阮
元云釋文出簡閱二字則陸本無猶字云稽猶計也合也者說
文稽部云稽留止也引申爲審慎攷計之稱故又訓爲計稽計
聲亦相近水經漸江水酈道元注云會稽者會計也凡事物法
數必攷計而後合同故又訓爲合廣雅釋詁云稽合也皆展轉
引申之義也稽訓計官正及大司馬注義並同云合計其士之

卒伍閱其兵器爲之要簿也者若鄉師云凡四時之田簡其鼓
舞旗帜物兵器修其卒伍又縣師云及其六畜車輦之稽是也要
簿亦卽簿書云故遂人職曰稽其人民簡其兵器者證簡稽本
爲考閱人民兵器之事遂以名其簿書也此注據遂人以人民
屬稽兵器屬簡其實二者亦可互通故鄉師云稽其鄉器是器
亦曰稽大宗伯云大田簡廟是廟亦曰簡明通言不別也引國
語曰黃池之會吳陳其兵皆官帥擁鐸拱稽者吳語吳王夫差
會晉公于黃池吳晉爭長吳王乃令服兵擐甲陳士卒百人
以爲微行百行行頭皆官帥擁鐸拱稽韋注云擁猶抱也拱執
也抱鐸者恐有聲也唐尚書云稽采戟也鄭司農以爲稽計兵
名籍也亦引此經聽師出以簡稽爲證先鄭引之者明彼拱稽

卽執士卒之簿書也云版戶籍者司民云登萬民之數自生齒以上皆書于版官伯先鄭注云版名籍也以版爲之今時鄉戶籍謂之戶版釋名釋書契云籍籍也所以籍疏人民戶口也案管于禁藏篇云戶籍田籍者所以知饑富之不書也史記秦本紀云獻公十年初爲戶籍相伍是周時有戶籍之名版詳官伯疏云閭地閭也者廣雅釋詁云閭蓋也司會注云閭土地形象田地廣狹又大司徒云掌建邦之土地之閭蓋自邦國以至閭里皆有閭以辨其區域也云聽人訟地者以版圖決之者小司徒云壠訟以圖正之兼云版者地之夫家田業之數皆著於版也引司書職曰邦中之版土地之閭者詔版爲戶籍圖爲地圖也云稱貴謂貸子者子舊本並譌予今據宋婺州本正賈疏云

謂貸而生子者若今舉責卽地官泉府職云凡民之貸者以固
服爲之息若近郊民貸則一年十一生利之類是也案賈述注
亦作貸予是也管子輕重丁篇云桓公曰疇丘之職民多稱貸
負子息以給上之急度上之求孟子滕文公篇云又稱貸而益
之趙注云稱舉也有不足者又當舉貸予倍而益滿之史記貨
殖傳云子資金錢千貫又云長安中列侯封君行從軍旅齎貸
子錢索隱云子謂租息也貸子蓋漢時常語漢書淮陽憲王欽
傳顏注云責謂假貸人財物未償者也案稱當從趙岐訓爲舉
稱責猶言舉責也說文革部云再舉也此稱卽再之假字貢疏
謂彼此俱爲稱意故爲稱責非其義說文貝部云責求也今俗
作債非云傳別謂券書也者傳別總名爲券書丁晏云說文刀

部券契也从刀委聲券別之書以刀判契其旁故曰契券釋名
釋書契券總也相約束繩緜以爲限也云聽訟賣者以券書決
之者凡稱賣而抵冒不償或償不如約及未予而訟貨已償而
索以此成訟者並以券書之有無眞僞決之云博傳著約束
於文書者淮南子原道訓高注云傳著也謂爲文書列其稱賣
之數又爲約束何時償還及子息多少並傳著於券書之上此
爲整券不中別爲兩也云別別爲兩兩家各得一也者廣雅釋
詁云別分也士師亦云傳別先鄭注云若今時市買爲券書以
別之各得其一義與此同案此亦傳著約束於文書但其初書
時爲一券書訖乃中別爲兩所貸與予者各得其一與傳爲一
券止一家得之者異也先鄭士師注又以傳別爲一與此注小

異詳彼疏賈疏云二家別釋後鄭不從者名爲券書即是傳著於文書可知後鄭傳別二字共爲一事解之云禮命謂九賜也者曲禮孔疏云公羊云命者何加我服錫者何賜也是其命賜相將也周禮九儀一命受職再命受服三命受位四命受器五命爲則六命賜官七命賜國八命作牧九命作伯案含文嘉九賜一日車馬二日衣服三日樂則四日朱戶五日納陛六日虎賁七日斧鉞入日弓矢九日秬鬯鄭司農以周禮九命與九賜是一也康成以九命與九賜不同九賜謂入命作牧九命作伯之後始加九賜知者王制云三公一命卷若有加則賜二日衣服之屬是也又宋伯入命作牧注云侯伯有功德加命得專征伐王制云賜弓矢然後征詩云毫彼玉瓊黃流在中傳曰九命

然後賜以圭瓚又尚書文侯仇受弓矢秬鬯左傳晉文公受大路戎路弓矢秬鬯虎賁此皆九命之外始有衣服弓矢秬鬯等之賜故知九賜不與九命同也其公羊說九賜之次與舍文嘉不同一日加服二日朱戶三日猶陞四日與馬五日樂則六日虎賁七日斧鉞入日弓矢九日秬鬯異人之說故文有參差大略同也異義許慎說九賜九命鄭康成以爲不同具如前說案孔說未審九賜韓詩外傳白虎通義考點篇公羊莊元年傳何注並作九錫賜錫義同然此經九命與九賜事不相涉故曲禮夫爲人子者三賜不及車馬後鄭注三賜而未嘗援九賜爲說先鄭此注雖以九賜釋禮命而實不謂卽大宗伯九儀之命故先鄭彼注亦絕無九賜之說與許氏五經異義說益小異曲禮

疏謂司農以九命與九賜爲一失其指矣云書契符書也者釋名釋書契云契刻也刻識其數也曲禮云獻粟者執右契注云契券要也右爲尊易繫辭傳後世聖人易之以書契李鼎祚集解引九家易云契刻也金決竹木爲書契大案符書者卽質人後鄭注所云其券之象書兩札刻其側者也此皆合井兩札刻書以爲符信故曰符書說文竹部云符信也淮南子主術訓云以一合萬若合符者也蓋書雖分著兩札并而刻其邊側以紀數又析之使取者予者各持其一其人往取則予者并兩札驗其側文合否而後予之也惠士奇云列子說符云宋人有遊於道得人遺契者歸而藏之始數其齒日吾富可待矣契一作挈漢書有租挈及廷尉挈令卒昭日在板挈也易林大畜之末濟云

符左契右相與合苗案惠說足證符契之義凡符契皆刻其側謂之齒詳質人疏賈疏謂官券符璽之書此據官予民物何得爲符璽之書解之故後鄭不從非也云質劑謂市中平賈今時月平是也者質人先鄭注云質劑月平賈也質大賈劑小賈說文刀部云劑齊也齊平義相近賈疏云後鄭不從者地官質人云大市以質小市以劑若今月平賈不合有兩名故不從也孔廣森云漢書溝洫志注律平價一月得錢二千所謂月平也楊子法言曰一閏之市必立之平蓋市價以時貴賤故每月更平之景武功臣表梁期侯任當于坐賣馬一匹貢錢十五萬過平減五百以上免案孔說是也月平者漢時市價蓋每月評定貴賤若今時朔望爲長落也漢書食貨志載王莽令諸司市當以

四時中月實定所掌爲物上中下之賈各自用爲其市平卽此
月平也云要會謂計最之簿書者月令季冬農事備收舉五穀
之要注云定其租稅之簿呂氏春秋季冬紀高注云要簿書也
國語魯語云收攢而蒸納要也小爾雅廣詁云最凡目質要也
說文言部云計會也算也又日部云最犯而取也又日會又一
部云最積也案凡經典之言計最會最目嚴最者皆取之借
字音義並與聚同故公羊隱元年傳云會猶最也何注云最聚
也最之言聚若今聚民爲投最今並讀如字非也漢書嚴助傳
歷奉三年之計最瀕注云計凡要也史記周勃世家索隱云最
都凡也是計最者總聚事物而算校其名數之言計最則有簿
書故此注釋要會爲計最之簿書也簿書詳司會疏云月計日

要歲計日會者以一月之計少舉其凡要而已故謂之要一歲
之計多則總聚攷校故謂之會也云故宰夫職日歲終則令羣
吏正歲會月終則令正月要者證要爲月計會爲歲計也云傳
別故書作傅辨鄭大夫讀爲符別杜子春讀爲傅別者後漢書
鄭輿傳云興字少贛河南開封人也建武六年徵爲太中大夫
好古學尤明左氏周官案興作周禮解詁見鄭自敘注凡引鄭
大夫義皆其遺說也段玉裁云故書作傅大夫讀爲符故書作
辨子春大夫皆讀爲別司農從別不從符作傅別鄭君字從司
農而義則有異故又自出其說也辨別二字古多通用如月令
章句引別名記卽白虎通之辨名記竊謂此當從故書作辨而
以辨讀爲別列於注不當易經文從杜鄭謂辨別義與音本皆

同也惠士奇云傳別故書作傳辨杜子春讀爲傳別案荀子性惡篇辨合符驗恐謂辨猶別也合猶傳也傳別猶辨合也蓋辨而別之爲兩合而傳之爲一如符節然詒讓案士師傳別注云故書別爲辨鄭司農云傳或爲付辨讀爲風別之別又朝士凡有責者有判書以治則聽注云故書判爲辨鄭司農讀爲別傳與符付辨與判並聲類相近辨與別亦一聲之轉說文竹部云符漢制以竹長六寸分而相合大夫讀傳爲符蓋亦謂稱責之符信分而相合者也凡此經傳別別字先鄭讀並與大夫子春同後鄭爲朝士從今書作判餘亦並同三君讀蓋因傳義自通不煩破爲符字而別則與一札中別之義尤切故從杜破字也云玄謂政謂賦也者孟子盡心篇趙注云征賦也廣雅釋詁云

征賦稅也謂若大宰九賦之等云凡其字或作政或作正或作
征者謂政正征聲類同經文三字錯出皆謂賦也或作政者謂
此種及遂人云以起政役又若小司徒之平其政均人之地政
力政遂人之平政羽人之羽翮之政都司馬之政學是也或作
正者若司書之九正司門之正其貨廩司勸之無國正諸子之
司馬弗正是也或作征者小司徒云凡征役之廩舍又旅師云
使無征役又若獻人之獻征大司徒之地征薄征等經文常見
不復詳舉云以多言之宜從征者以征賦無正字故於三者之
中據其多者從之此後鄭自著其發疑正讀之例也云如孟子
交征利云者孟子梁惠王篇云上下交征利趙注云征取也鄭
引之者證征爲徵取賦稅之名賈疏謂引證征是口稅之法非

鄭指吳瓦華云征役力役之征也案吳說是也後鄭讀政爲征得之而釋爲賦稅之征則非云傳別謂爲大手書於一札中字別之者此始成先鄭義也說文木部云札牒也士師注云傳別中別手書也朝士謂之判書又謂之別券管子問篇云閭人之貸粟米有別券者幾何家卽此稱責之傳別也又大臣篇云君與有司爲別契注云別契謂分別其契以知眞僞也別契與別券義亦同賈疏云謂於券背上大作一手書字札字中央破之爲一段別之呂飛鵬云釋名釋書契云別別也大書中央中破別之也卽今市井合同案呂說是也中字別之謂字一行中分而爲兩劄魏文心雕龍書記篇所謂字形半分者是也傳別破別爲二各執其一責時則合二者以爲驗故史記平原君傳云

操右券以資又孟嘗君博云馮驩召諸取錢者能與息者皆來
不能與息者亦來皆持取錢之券合之是其證也云書契謂出
予受入之凡要者賈疏云此予則取予謂若泉府云凡賒者祭
祀無過旬日喪紀不過三月及旅師云春頒秋斂賒取官物後
還無生利之事凡要亦是簿書也詒讓案說文大部云契大約
也凡以文書爲要約或書於符券或載於簿書並謂之書契若
宰夫入職五日府掌官契以治藏酒正云凡有秩酒者以書契
予之質人掌稽市之書契此謂符券之書契故質人後鄭注謂
書而札刻其側是其制也若司會云掌國之官府郊野縣都之
百物財用凡在書契版圖者之貳大司馬云羣吏選車徒讀書
契此謂簿書之書契也此云聽取予以書契與酒正之書契同

自指符券而言故先鄭前注以符書爲釋然取予之數亦自當有簿書符券簿書二者並爲凡要故後鄭又增成其義又案注云出予受入之凡要謂各司府藏之官以物出而予人及以物來入受取藏之者之凡目皆是若酒正有秩酒者授以書契卽所謂出予之凡要也然則取予與出入事本相類而書契與要會異者書契乃未予未取之前豫定其數以爲符信要會則既出既入之後總計其數以待校覈也云凡簿書之最目獄訟之要辭皆曰契者最亦最之借字最目猶凡目總目司會注云書謂簿書契其最凡也方言劉歆與楊雄書云欲頗得其最目是最日漢人常語賈疏云簿書之最目日契卽取予以書契是也獄訟之要辭曰契卽鄭引春秋傳者是也引春秋傳日王叔氏

不能舉其契者左襄十年傳文杜注云契要契之辭賈疏云彼
云王叔陳生與伯輿爭政晉侯使士匄平王室使王叔氏與伯
輿合要王叔氏不能舉其契此卽獄訟之要辭曰契云質劑謂
兩書一札同而別之長曰質短曰劑者賈疏云案地官質人云
大市以質小市以劑鄭注大市人民牛馬之屬用長券小市兵
器珍異之物用短券言兩書一札同而別之者謂前後作二券
中央破之兩家各得其一皆無手書字異於傳別案賈說非鄭
信也司市注亦云質劑謂兩書一札而別之也若今下手書言
保物要還矣則後鄭意不謂質劑無手書矣綜校鄭義益質劑
傳別書契同爲券書特質劑手書一札前後文同而中別之使
各執其半札傳別則爲手書大字中字而別其札使各執其半

字書契則書兩札使各執其一札傳別札字半別質劑則唯札半別而字全具不半別書契則書兩札札亦不半別也惠士奇云後漢書張衡傳應闇云云萬方億醜并質其劑章懷注云質劑猶今分支契也質劑左氏文六年傳謂之質要荀子王霸篇謂之質律不徒賣買用之旅師平頑與積斂之民而散之民亦憑質劑以爲信焉又旬計日月歲計日月要歲計日歲會皆名爲質王制所謂司會以歲之成質於天子冢宰齊戒受質是也又獄之要辭亦名爲劑大司寇以兩劑禁民獄是也然則傳別質劑要會三者皆書契之別名也云傳別質劑皆今之券書也事異異其名耳者傳別爲券書與先鄭義同後鄭意質劑與傳別漢俗通謂之券書歷時則事別爲名破先鄭質劑爲半質傳別漢俗通謂之券書歷時則事別爲名破先鄭質劑爲半質

不爲券書也左傳文六年杜注云質要券契也云禮命禮之九命之差等者若典命五儀五等之命春官敍官注云命謂選拔羣臣之書是也賈疏云謂若大宗伯九儀從一命受職以至九命作伯差等有九是也沈彤云聽祿位以禮命明制祿之多寡本以爵等而兼命數也自大夫而上以策書之所命皆主乎爵而以數爲之等以聽官府之六計弊羣吏之治一曰廉善二曰廉能三曰廉敬四曰廉正五曰廉凜六曰廉辨聽平治也平治官府之計有六事弊斷也既斷以六事又以廉爲本善善其事有辭譽也能政令行也敬不懈于位也正行無僥邪也法守法不失也辨辨然不疑惑也杜子春云廉辨或爲廉端疏以聽官府之六計弊羣吏之治者卽大宰八灋之八日官計以弊邦治

也羣吏亦通百官府言之。注云聽平治也者說文言部云訂平議也。訂聽聲義相近國策秦策高誘注云聽治也。此經凡言聽治聽獄訟皆謂平正斷決其是非義並略同云平治官府之計有六事者賈疏云六計謂善能教正法辨六者不同既以廉爲本又計其功過多少而聽斷之云弊斷也。看大宰注同云既斷以六事又以廉爲本者禮運云大臣法小臣廉此六計通大小臣亦以廉爲本也。賈疏云此經六事皆先言廉後言善能之等故知將廉爲本廉者絜不溢濁也。王安石王昭甫易祓王與之黃以周並訓廉爲察蓋以廉爲覈之借字說文見部云覈察視也讀若錢於義亦通云善善其事有辭譽也者說文誼部云誼吉也。重文誼篆文義从言善卽善之義省宰夫以法警戒羣

吏書其能者與其良者而以告于上注云良猶善也下廉能卽能者此廉善卽良者謂善於其所司之職事有辭令名譽也云能政令行也者大宰注云能有才藝者司諫云辨其能而任于廟事者謂有才藝能任事則政令自行也云敬不解于位也者于注例當作於各本竝誤不解於位詩大雅假樂篇文釋名釋言語云敬警也恆自肅警也說文支部云敬肅也又心部云敬怠也解卽懈之借字賈疏云謂敬其職位恪居官次也云正行無傾邪也者賈子道術篇云方直不曲謂之正毛詩大雅小明傳云正直爲正云法守法不失也者此亦注用今字作法也賈疏云謂依法而行無有錯失也云辨辨然不疑惑也者敘官注云辨别也惠棟云辨然不不讀爲否漢官儀解博士云士者辨

於然否是也案惠說是也然此疑當作辨辨然不不疑惑也今本脫一不字白虎通義爵篇引傳曰通古今辨然不謂之士說苑修文篇云辨然不通古今之道謂之士辨然不即辨然否也然不既辨故能不疑惑大史注亦云攷案謂其然不是也賈疏謂其人辨然於事分明無有疑惑之事蓋所見本已脫不字故不得其解釋文不爲上不字發音則陸本亦與賈同杜子春云廉辨或爲廉端者賈疏云經本或爲廉端後鄭不從者若爲端端亦正與廉正爲重故不從段玉裁云或爲者志其本之異也于春乃劉歆弟子而所見之本已有乖異不同之處以漢掌祭祀朝覲會同賓客之戒具軍旅田役喪荒亦如之法謂其禮法也戒具戒官有事者所當共疏以掌掌祭祀朝覲會同賓客之

戒其軍旅田役喪紀亦如之者賈疏云此七事在大宰八法中六日官法彼在八日官計上者以其彼有數故在上此旨法無數故退在六計下也注云法謂其禮法也者此亦注用今字

作法也賈疏云言禮法謂七者皆有舊法依行若九式云戒具

戒官有事者所當共者卽大宰誓戒具修是也彼注云具所當

共謂以所當共之事戒所掌之官警其廢闕此經不言誓修者

文不具也七事者令百官府共其財用治其施舍聽其治訟七

事謂先四如之者三也施舍不給役者七事故書爲小事杜子

春云當爲七事書亦爲七事疏七事者令百官府共其財用者

設文人部云供設也一日供給此經通借共爲供羊人注云共

猶給恤外府云凡祭祀賓客喪紀會同軍旅共其財用之幣齋

賜予之財用此官卽令外府等眾官府共之也云治其施舍者施舍釋文引作弛舍案施舍與弛捨聲類同阮元云凡經云施舍字注皆讀施爲弛此注不言讀爲蓋經本作弛字案阮說是也云聽其治訟者治訟是二事司市云聽其大治大訟小治小訟此治蓋謂以事來咨辯及有所陳訴請求旅師云凡新訟之治皆聽之注云治謂有所求乞也方士云凡都家之士所上治則主之訝士云凡四方之有治於士者造焉注謂獄疑辨事皆其一隅也凡咨辯陳訴請求必有辭故治亦曰辭小司徒云聽其辭訟辭訟卽治訟也訟謂爭訟之事管子立政篇云疏遠無蔽獄孤寡無隱治彼以獄與治並舉猶此云治訟也訟亦有辭故通言之訟亦謂之治質人云凡治質劑者朝士云凡士之治

有期日注並以聽訟爲釋是也 注云七事謂先四如之者三
也者謂蒙上計數總爲七事猶內宰云二事也賈疏云七事先
四謂從祭祀至賓客云如之者三者從軍旅至喪荒也言以法
掌祭祀已下七者皆是上六縣百官職事通職者然六縣之中
不言朝覲會同者以彼賓客中可以兼之以其朝覲會同還是
諸侯賓客之事此七事不言斂弛以其非七事中之大事故退
之在下云施舍不給役者者施疑亦當從釋文引經作弛卿師
注云施舍謂應復免不給繇役義與此同凡免力役大司徒謂
之弛卿大夫謂之舍兼而言之則曰弛舍又左氏宣十二年傳
云旅有施舍國語周語云縣無施舍彼施舍乃被予之假借字
與此經凡言施舍者義別云七事故書爲小事杜子春云當爲

七事書亦爲七事者段玉裁改書亦爲七事爲書亦或爲七事云此杜改定字誤案段校是也曾釗云小事卽上云小事皆有聯是也凡非祭祀朝覲會同軍旅田役喪荒之事皆謂之小事小與七形聲並遠無容故書謂作小俞樾亦云七事上文旣明列其目則但云令百官府共其財用云云足矣不必更斥之曰七事者全經亦無此例當從故書爲小事案曾俞申故書義亦通前六聯一祭祀二賓客三喪荒四軍旅五田役六斂弛皆爲大事而復云小事皆有聯此上文與彼正同惟無斂弛耳故此亦以小事者爲更端之文令百官府共其財用等卽上文戒具之事也此明大事則此官親掌其戒具小官則令他官共治之耳故書亦足備一義凡祭祀贊玉幣岱之事祿將之事又從大

宰助王也將送也祿送送祿謂贊王酌饗鬯以獻尸謂之祿祿之言灌也明不爲飲主以祭祀唯人道宗廟有祿天地大神至尊不祿莫稱焉凡饗鬯受祭之肆之奠之疏凡祭祀贊玉常爵

疏

凡祭祀贊玉常爵

之事者以下至職末並小宰之官常也玉唐石經及今本並作王岳珂九經三傳沿革例引越本注疏及建大字本同宋婺州本余本董本建小字本並作玉段玉裁云凡祭祀二字就五帝大神祿先王而言也此玉常爵卽大宰之祀五帝贊玉常爵故注云又從大宰助王疏云贊此三者唐石經及越注疏建大字本作王常爵非也案段說是也阮元黃石烈說並同今據正宋書禮志朱膺之議引此經云凡祭祀贊王祿將之事則贊劉宋時已有此謠本不自唐石經始矣但大宰云祀五帝贊玉常爵

之事祀大神而亦如之注云不用玉爵尚質也彼下文又云享先王亦如之贊玉爵此凡祭祀有祿將則通享先王而言贊爵內亦當兼有匏本玉諸爵與大宰文同而義則較廣也注云又從大宰助王也者州長注云贊助也賈疏云案大宰職云祀五帝贊玉幣爵今此又云祭祀贊此三者謂小宰執以投大宰大宰執以投王是相贊助故云又從大宰助王也云將送也者爾雅釋言文小宗伯大史注並同云祿送送祿者以將訓送祿送卽是送祿經言祿將者文到耳詩大雅文王篇殷士膚敏祿將于京毛傳云將行也毛訓祿將爲行祿與送祿義亦相近云謂贊王酌鬯鬯以獻尸謂之祿者卽宗廟九獻之初獻也大宗伯注云灌以鬯鬯謂始獻尸求神時也賈疏云上云贊玉幣爵

據祭天而下別云祿將見祿祭宗廟且上大宰不言贊祿將助
大宰不贊之故此注云贊王酌鬯鬯也段玉裁云大宰享先王
不云贊祿將然則小宰於享先王自助王不同祀五帝從大宰
助王故注別之云贊王也案段說是也祿小宰直助王不從大
宰毛詩大雅旱麓傳云祭祀之禮王祿諸臣助之諸臣卽指小
宰孔疏謂祿亦大宰小宰同助王夫之云祿之言灌也者大宗
伯玉人注並同說文彌部云祿灌祭也毛詩文王傳同案許以
祿字从彌專屬祭祀之祿大行人五等諸侯之祿先鄭讀爲灌
蓋謂賓客當言灌不當言祿也後鄭之意則以祭祀之祿卽爲
灌戶與祿賓客字義同廣雅釋詁云灌漬也祿戶祿賓並取酌
據也灌漬之義古音祿灌雙聲後世音讀同此經祭祀賓客之

祿通作祿又或借作果論語八佾禮記禮器郊特牲明堂位疏
祭祀之祿通作灌蓋並以聲義相近通用云明不爲飲主以祭
祀者明祿灌之義廟享備九獻朝斂以後七獻皆飲惟二祿不
飲故獻九而飲七司尊彝注所謂二祿爲奠而尸飲七是也祿
以灌地降神故云主以祭祀云唯人道宗廟有祿者大宗伯云
以肆獻祿享先王唯廟享言祿凡賓禮大賓客亦有祿是祿爲
人道故唯宗廟有之也云天地大神至尊不祿莫稱焉者祭天
地唯七獻無二祿也禮器云德產之致也精微觀天下之物無
可以稱其德者卽至尊莫稱之義賈疏云據大宰祀五帝及大
神而皆不言祿此文又祿將在玉幣爵之下明宗廟有祿天地
無祿且大宗伯祀天言祿祭社言血享廟言灌是亦天地無祿

也天地大神不灌者不用降祿無妨用秬鬯必若然天地用八
尊直有五齊三酒不言秬鬯尊者以其寡人職天地八尊者以
與宗廟六彝相對爲文鬯人職秬鬯不入舞尊則別有尊矣不
言者略耳不祿者覆載之德其功尤盛欲報之德無可稱焉故
無祿直加敬而已其牲用特其器陶匏皆是質略之事故鄭云
莫稱焉祭天地旣言無灌案宗伯注玉鬯又案禮記表記云親
耕粢盛秬鬯以事上帝上帝得有秬鬯者案春官鬯人職掌共
秬鬯下所陳社稷山川等外神皆用秬鬯不用鬱鬯人職用鬱
鬯者唯有宗廟及祿賓客耳黃以周云典瑞祿圭止於肆先王
玉人祿圭止於祿廟則祿天地不祿明甚表記秬鬯以事上帝
謂享酒非祿酒也梁明山賓引表記文以證明堂有祿亦誤詭

謾案玉人大璋中璋天子以巡守注謂以事山川則用灌是外
神山川亦有灌故鄭云天地大神不禫明非大神或閒有禫非
禮之至者也山川有灌則亦用鬯鬯賈說非是云凡鬯鬯受祭
之啐之奠之者猶特牲饋食禮尸祭酒啐酒奠解是也士昏禮
啐禮注云啐嘗也雜記主人之酢也啐之眾賓兄弟則皆啐之
注云嚼啐皆嘗也嚼至齒啐入口鄭言此者亦明不爲飲主以
祭祀之義賈疏云謂王以圭瓚酌鬯鬯獻戶后亦以璋瓚酌鬯
鬯獻戶戶皆受灌地降神明爲祭之向口啐之啐之謂入口乃
奠之於地也凡賓客贊祿凡受爵之事凡受幣之事唯祿助宗
伯其餘皆助大宗王不酌賓客而有受酢大宗伯職日大賓客
則搘而載祿凡賓客贊祿者賈疏云案大行人云上公再祿

而酢侯伯一裸而酢子男一裸不酢謂諸侯來朝朝享既畢王禮之有此灌酢之禮也云凡受爵之事者大宰注云玉爵王禮諸侯之酢爵是也賈疏云謂上公與諸侯酢王之爵王受之云凡受幣之事者大宰注云玉幣諸侯享幣也案受幣疑當兼受瑞玉及三享之玉言之詳大宰疏注云唯祼助宗伯者據大宗伯云攝裸而大宰不云贊裸小宰非宗伯屬官而贊之者亦官職也鄭言此者明二者贊同而所贊則異云其餘皆助大宰者大宰職云大朝覲會同贊玉幣玉爵是也賈疏云謂受爵幣二者皆助大宰賓客酢王之時大宰於賓處受而授王王飲訖大宰受爵以授小宰受幣之時亦王親受受以授大宰大宰以授小宰也云王不酌賓客而有受酢者謂王祼諸侯則使宗伯

代酌主賛王但拜送而已至裸訖諸侯酌玉爵報酢王則王親受飲之不使宗伯代也賈疏云案燕禮使宰夫爲主人是君不酌臣於諸侯亦然受酢是飲酒之事臣不可代君飲酒故有受酢之事也引大宗伯職曰大賓客則攝而載裸者明裸助宗伯之事若賓客爲上公宗伯兼攝后裸則內宰贊之小宰止贊攝王裸也詳彼疏喪荒受其含襚幣玉之事春秋傳曰口實曰含衣服曰襚凶荒有幣玉者賓客所嗣委之禮疏喪荒受其含襚常玉之事者賈疏云喪謂王喪諸侯有致含襚幣玉之事荒謂凶年諸侯亦有致幣玉之事七大宰不言則此小宰專受之案禮記少儀云臣致襚於君則日致廢衣於賈人則諸侯臣皆得致含也詔讓案雜記說諸侯喪受含襚贈之禮云宰舉璧

與圭宰夫舉襚與此王喪小宰受含襚幣玉之事足相比例
注引春秋傳曰口實曰含者公羊文五年傳云含者何口實也
文與此注不同或鄭約引之口實詳大宰疏御覽禮儀部引春
秋說題辭云口實曰含緣生象食孝子不忍虛其欲痛疑此注
所引卽說題辭文春秋傳傳當爲說之誤凡鄭注三禮引緝候
並稱說詳大司樂疏云衣服曰襚者說文衣部云襚衣死人也
引春秋傳曰楚使公親襚又祝贈終者衣被曰祝是送死衣服
當以祝爲正字今經典並假襚爲之小爾雅廣名云衣服謂之
襚荀子大略篇云衣服曰襚與此注同公羊隱元年傳云衣被
日襚又穀梁傳云衣衾曰襚衣服卽陔衾被之屬白虎通義崩
薨篇云襚之爲言遺也衣被曰襚知死者則贈襚所以助生送

死追思重終副至意也士喪禮鄭注公羊何注義並同御覽禮儀部引說題辭云衣被日襚養死具也疑此亦據說題辭文與上並引春秋說也案襍記云諸侯相襚以後路與冕服則襚亦有車馬不徒衣服矣云凶荒有幣玉者賓客所賙委之禮者明凶荒唯有幣玉無舍襚也賈疏云案小行人云若國凶荒則令賙委之彼謂王家賙委諸侯法此謂諸侯賙委王家法也詒讓案凶荒賙委當以泉栗然必執幣玉以致之故鄭以幣玉爲賙委之禮也月終則以官府之敘受羣吏之要主每月之小計疏月終則以官府之敘受羣吏之要者以下並小宰總掌六官之官計官成也賈疏云月計日要故每月月終則使官府致其簿書之受之當先尊後卑故言敘詒讓案酒正云酒正之出日

入其歲月入其要小宰聽之上六敍云以敍受其歲會亦兼月
要也月要事小故小宰專受之不贊冢宰不受日歲者日歲事
尤小故宰夫及當官之長自受不問小宰也羣吏亦通百官府
言之注云主每月之小計者明月要對日歲則爲大對歲會
則爲小小宰得專主其事也賈疏云言小計對下經歲會爲大
計也若大會則下文冢宰平之贊冢宰受歲會歲終則令羣吏
致事使齋歲盡文書來至若今上計疏贊冢宰受歲會者賈疏
云歲計日會言冢宰則據百官總焉謂助冢宰受一歲之計王
引之云贊冢宰受歲會當在歲終宰夫職曰歲終則令羣吏正
歲會月終則令正月要大宰職曰歲終則令百官府各正其治
受其會聽其致事是冢宰受歲會在歲終也小宰贊之亦當在

此時案王說是也經文在歲終之前者爲下句發耑非蒙上月
終爲文也云歲終則令羣吏致事者歲終爲夏之季冬詳宰夫
疏賈疏云謂使六官各致一年功狀將來考之故也注云使
齋歲盡文書來至者亦訓致爲至也詳大宰疏云若今上計者
續漢書百官志云凡郡國歲盡遣吏上計漢法上計於歲盡與
閏歲終羣吏致事同故舉以爲況賈疏云漢之朝集使謂之上
計吏謂上一年計會文書及功狀也丁晏云漢書武帝紀受計
於甘泉師古曰受郡國所上計簿也若今之諸州計帳詔讓案
左昭二十五年傳云臧會爲邸賈正計于季氏杜注云送計簿
於季氏晏子春秋外篇云晏子治東阿上計又淮南子人閒訓
說建文侯時解扁爲東封上計而入三倍是時已有上計之

名漢亦沿周法也正歲帥治官之屬而觀治象之灋徇以木鐸
曰不用灋者國有常刑正歲謂夏之正月得四時之正以出教
令者審也古者將有新令必奮木鐸以警眾使明聽也木鐸木
舌也文事奮木舞武事奮金鐸疏正歲帥治官之屬而觀治象
之灋者亦書縣而觀之經不言縣者以大宰正月縣治象已詳
可以互推也此小宰正歲縣治象使治官觀與大宰正月縣治
象使萬民觀者爲一事鄭大宰注并一者爲一云大宰以正月
朔旦布王治之事於天下至正歲又書而縣於象魏使萬民觀
焉小宰亦帥其屬而往其說非也又案依鄭說此治象卽縣於
象魏竊謂萬民所觀於象魏者以其人眾且庶民不得入王之
中門也此百官所觀似不宜與彼同處疑當縣於治朝旁大宰

治事之舍卽匠人之九室是也小司徒縣敎法小司寇縣刑法
蓋亦當各就司徒司寇治事之舍互詳大宰小司徒疏云徇以
本鐸者說文彳部云徇行示也司馬法斬以徇徇卽徇之俗云
曰不用灋者國有常刑者誓以不用治法之刑常刑謂官刑之
常典也大司徒賈疏云常刑者謂二千五百條各依輕重而受
刑法　注云正歲謂夏之正月得四時之正以出教令者審也
者全釋凡言正歲者並爲夏正建寅之月別於凡言正月者爲
周正建子之月也爾雅釋天云夏曰歲商曰祀周曰年左傳昭
七年孔疏引孫炎云四時一終曰歲取歲星行一次也周書周
月篇云萬物春生夏長秋收冬藏天地之正四時之極不易之
道夏數得天百王所同其在商湯用師于夏則時革命改正朔

以建丑之月爲正亦越我周王致伐于商改正異械以垂三統
至於敬授民時巡狩祭享猶自夏焉是謂周月以紀于敬是用
雖建子亦兼存夏正之事也王引之云爾雅曰正長也建寅之
月爲一歲十二月之長故謂之正歲猶月之朔日爲一月三十
日之始而稱朔月也云古者將有新令必奮木鐸以警眾使明
聽也者木鐸有聲故振奮以警眾明堂位云振木鐸於朝天子
之政也注云天子將發號令必以木鐸警眾諭語八佾集解引
孔安國云木鐸施政教時所振也賈疏云案禮記檀弓云自寢
門至於庫門振木鐸日舍故而諱新彼及此文是有命奮木鐸
警眾使民聽之事也宋依鄭賈說此觀治象當在庫門內徇木
鐸疑亦當自寢門以至皋門寢門外爲治朝庫門外皋門內爲

外朝與明堂位所說亦正合云木鐸木舌也者鼓人注云鐸大
鈴也呂氏春秋仲春紀高注云鐸大鈴也金口木舌爲木鐸金
舌爲金鐸北堂書鈔武功部引三禮圖云鐸今之鈴其匡銅爲
之木舌爲木鐸金舌爲金鐸也揚子法言學行篇云如將復鑿
其所說則莫若使諸儒金口而木舌卽謂木鐸也云文事奮木
鐸者此職之治象小司徒之教法官正司烜氏之火禁鄉師之
四時徵令小司寇之刑象士師之五禁皆以木鐸徇之又植弓
令舍故諱新月令仲春先雷三日奮木鐸以令兆民左襄十四
年傳及僞古文書崩征正月孟春道人以木鐸徇于路皆所謂
文事也書僞孔傳云木鐸金鈴木舌所以振文教云武事奮金
鐸者吳子治兵篇云夫擊鼓金鐸所以威耳貫疏云鼓人云金

鐸通鼓大司馬云兩司馬振鐸是也乃退以宮刑憲禁于王宮
憲謂表縣之若今新有法令云疏乃退以宮刑憲禁于王宮者
謂與觀治象徇木鐸同日徇行既畢而退遂憲刑禁禁卽前云
王宮之糾禁是也此蓋不兼后宮內宰云憲令于王之北宮是
后宮內宰憲禁此官所憲者蓋自王六寢以外五門三朝之地
通憲之與內宰內外職掌互相備也注云憲謂表縣之者小
司徒胥師小司寇布憲注義並同荀子勸學篇云不道禮憲楊
注云憲標表也凡禁令欲眾共知則書而表縣之士師掌五禁
亦云書而縣于門閭卽所謂憲也列女傳舜通篇云齊景公有
所愛槐使人守之植木櫟之下令曰犯槐者刑傷槐者死此憲
禁蓋亦書刑禁於木表縣之全經凡云憲者如小司徒之憲禁

令司市之憲罰胥師小司寇布憲之憲刑禁朝士故書之憲刑
貶義並同士師說宮禁等云皆以木鐸徇之于朝書而縣于門
問此憲官刑與彼事相類蓋書而縣之自寢門以至于皋門與
徇木鐸同也賈疏云凡刑禁皆出秋官今云憲禁者與布憲義
同故小宰得秋官刑禁文書表而縣之於宮內也云若今新有
法令云者漢時新有法令亦必表縣之使衆共見故舉以爲況
令于百官府曰各修乃職攷乃灤待乃事以聽王命其有不共
則國有大刑乃猶女也疏令于百官府者此亦蒙上正歲爲文
百官府通内外言之不徒宮中也此官分就各官府一一戒敕
之與觀象時總於觀象之處徇戒者異又案地官觀象之
令在小司徒與此同而正歲令教官則在大司徒與此兩令同

在小宰異者以大宰總六官職重事繁故治官之戒令告小宰掌之教官事簡故正貳分掌之其事異也云曰各修乃職攷乃灋待乃事以聽王命者以下並戒令之辭徐幹中論誕交篇引此文待作備亦通職法卽大宰之官職官法事謂當職之事也云其有不共則國有大刑者謂職事有不共舉者則有刑大司寇五刑四曰官刑上能糾職卽糾其不共也大刑謂常刑之大者明堂位魯禘瞽戒云百官廢職服大刑注云大刑重罪也書費瞽瞽師亦云有常刑大刑僞孔傳以大刑爲死刑是也大司徒令教官云常刑與前觀治象及小司徒觀教象小司寇觀刑象之令同此云大刑者以治官所掌尤重故特警之職方氏王將巡守戒於四方亦云國有大刑與此正同注云乃猶女也

者嚴方氏注同小爾雅廣詁云乃汝也女汝古今字

周禮正義卷五終